

Nkoi, mboloko, makako na mbali

Lisap'onge

Ónge!

Baímbóka boyambaka lisapo eee

Eeeeeee

Ezaláká mokolo moko, na mbóka yoko boye, Nkoi azaláká na baníngá na ye mísáto. Bavandí na etúká ya mbóka na bangó wána. Nkoi abengí Makáko, abengí Mbólókó, ayékobénga Mbali, alobí:

— Ah ndéngé tovandi áwa tóbima naino mwa moke'tókende kotámbola. Mpó Nkoi atámbóláká, atíkí etúká ya mbóka ayeí kobima na mbóka moko'amoní básí kitoko mpenzá. Ntángo akomí kúná, bayambí yé, azalákí naino yé moko. Atúná bango: « basálaka ndéngé níni epái na bínó áwa mpó na kozwa mwási?»

Bísó áwa soki olingí óbala mwási áwa, yáká kotála naino bozwi na bísó. Bakeí balakisí Nkoi bantaba óyo wána babókolaka kúná. Likambo ya kokámwa, ezá nsókó!! Nkoi akosí mpé te alingí mwána moko'wána, alobí akoyá kotósa ekila óyo bakopésa yé. Bapésí yé ekila: « Bísó soki oyeí áwa boye tokoyamba yó, topésí yó mbéto. Soki ozá na moníngá na yó, tokoyamba bínó míbalé, tokopésa moto na moto na mbéto na yé, bozotálana ndéngé bokolala. Óyo kúná bakotiéla yé mai na nsé ya makolo, óyo kúná máí na nsé ya mbéto. Balalí tii na ntóngo, tokoyamba bínó bokozónga. Bayebísi Nkoi makambo nyóngo Nkoi alobí: « nakeí ».

Akei, akútání na Mbólókó:

— « Mbólókó »

— « o!moníngá bóní? »

Nkoi alobí:

« yáká tokende, kasi lokóla tozó kend'áwa boye, nakopésa yó bikila: esíká tozókende soki tokómí na bilanga ya kokó, yó okobúka káka óyo ya moke', ngai nakobúka óyo ya monéne. Soki tolekí tokómí esika bamama mikóló bazalí, soki bapésí mbo'te, yó ndé okondima. Soki tokómí esíká baseka bazalí soki bapésí mbo'te ngái Nkoi nakon-dima »

Mbólókó ayókí makambo máná nyóngo, bayokání mokolo ya kokende. Babandí kokende, bakeí, bakeí, bakomí na bilanga ya kokó, nkoi abúkí. Mbólókó abúkí káka óyo ya moke'wána. Babandí kokende, bakomí esíká bamamá bazalí:

— «Bána mbóte»

Mbólókó andimí: «Mbote»

Bakómí esíká ya baseka, baseka bapésí:

— «Mbote!»

Nkoi ayanólí mpenzá na esengo: «Mbote iyo».

Balekí bakeí, bakómí esíká babokiló bazalí. Ah babokilo bayeí. Bakómáká mwa ngonga óyo ntángo ya mpókwa. Bayambí bangó, bapésí bangó bya boléi, makambo nyóngo, bakomí kúná bafándí. Babokiló balobí: « esíká bínó boyeí áwa boye ekila na mbóka na bísó ezalaka ebelé. Ndéngé toyambí bínó, soki te ntaba moko'ebúngí, bokobála lisúsu mwási te. Bokobála te, yáká tókende » bamemí Nkoi na Mbólókó. «Bomoní!» Mbólókó alobí: « Ah Ah Ah », Nkoi alobí: « tóluka mayéle tósála mpé na mbóka na bísó tobokolo ba ntaba ». Nzóka Nkoi

azá na mayéle na yé mosúsu na motéma, Mbólókó azóyéba té. Ekómí, bazóngí baméli baméli, babokiló balobí: « bókóta bólála ».

Nkoi atuní: «Mbólókó, moníngá yǎ olálaka ndéngé níni? » « Ah ngái sǎkí nakǒtí ndéngé naláli boye, libélá ». Bakoti balali ekómí katikáti ya butú Nkoi alamúkí amóní Mbólókó aláli. Nkoi akití, alongólí nsáni ya máí óyo ya Mbólókó, asopí yangó akeí, akangí ntaba, akatí kíngó, azwí makilá asopí na nsáni ya máí wáná óyo batiélákí bangó mpó na ntóngó básukola. Afándí, aleí ntaba asílísí, akúmbí makilá wáná ayeí, akótísélí Mbólókó na nsé ya mbéto, yé azwí máí óyo ya yé atíkí káka, balali.

Ekómí ntǒngǒ, Nkoi moto wa yambo:

« moníngá tólamuka, tósukola. Nkoi asukólí, azwí kítí ya libándá afándí. Mbólókó asukólí, azóngí komilálisa mwǎ moke, ázila te ntǒngǒ éfungwama. Sǎkǎ azákomítombola boye, nkunza nyǒnsǎ ezókangama. Kúná milelo ebandí. Ntaba mǎkǎ ebungí.

Babokiló batúní

« Nkoi bínó boláli ndéngé níni?»

« Bísó toláli malámu, botiélákí biso máí. Óyo bokomǒna yé na makilá, yé wáná moto abomí ntaba na bínó, aleí »

Bandeko! Lisap'óngé!

Óngé!

« Tokotála óyo tokozwá yé na makilá yé wáná tokoboma ».

Ntǒngǒ étána, Mbólókó bimá, Mbólókó ámeke kotámbola boye nzóto nyǒnsǎ ekangamí na makilá, áluka ábima, ezókoka té. Mbólókó ámeke ábima « Ah! ah! ». Bazoméli yé:

« yǎ ndé moto oyíbákí ntaba »

Babéti Mbólókó babomí yé. Nkoi azongí na mbóka na yé. Avándí, mwási ya Mbólókó atúní yé. "Ah té, azá malámu azólía, bayambí bísó na ndéngé mǎkǎ kúná bisengo, akoyá na sima.

Avándí, elekí mikǒls misúsu, ayeí kobénga lisúsu nyama óyo Makáko.

« Makáko, yáka tókende epái ya babokiló ». Ayébísí Makámbo nyǒnsǎ ndéngé ásálaka. Na nzelá apesí bikila nyǒnsǎ

Lip'óngé!

Óngé!

Baí boyóka lisapo eeeeeeee

eeeeeeeeeeeeeeeeeeee

Azwí Makáko, babandí kokende, esíká ya kokó asálí káka ndéngé asálaki, esíká ya baseka, bapésí mbóte, eyambí káka yé Nkoi. Makáko atosí nyǒnsǎ tee bakómí kúná. Bayambí bangó, baleí malámu. Balalí, atúní yé:

« Makáko yǎ olálaka ndéngé níni? »

« Ndéngé káka toleí, nakangí míso naláli na ngái»

« ya sǎkǎ?»

« eh ».

Balalí, ekómí na katikáti ya butú Nkoi alamúkí, asálí lisúsu ndéngé akendákí na Mbólókó, akangí ntaba, abomí azwí makilá atié na nsáni, atiélí Makáko, yé azwí máí atié epái na yé. Ekómí na ntǒngǒ, Nkoi abimí moto ya yambo, asukólí. Makáko mpé alamúkí, asukólí, ntǒngǒ elekí, mwǎ butú ezalí. Makáko akosi lokóla mwǎ koluka kolála. Babokiló kúná babimí

«Ah ntaba mǎkǎ ebungí »

Bábima boye bakútí Nkoi wáná amínanolí avándí na yé malámu.

« Nkoi náni asálí likambo óyo? »

« óyo asálí yangó bokoyéba yé, káka ndéngé tokoyáka, bokoyéba yé, bokokanga yé na makilá na nzóto ».

Makáko áluka ábima boye poso ya nzóto nyǒnsǎ ekangámí na makila.

« Ehée yě moto abomí ntaba! »

Bazwí Makáko babomí yě. Nkoi azongí lisúsu, babokiló bazóngísí yě bakangélí yě biloko, azongí akeí.

Sima ya mikoko ayékokútana na Mbali. Nyama óyo Mbali azá na mayéle mpé lokóla Nkoi. Nkoi alobí:

« moníngá tozókende epái ya babokiló, kúná bási bazá ebelé »

Ayebísí yě káka ndéngé nyóhso óyo basálaka. Bakómí na esíká ya kokó, Nkoi abúkí ya monéne, yě mpé abúkí ya monéne.

Nkoi alobí:

« Ah yó otí ndé tembe na ngái?»

« Ah bolimbisi nabósání, sokí boye nabósání, nazózonga »

« kozónnga té, yáká, mbala ya sima kosála lisúsu té, támbólá tókende »

Babandí kokende, bakómí esíká ya bamamá, bápésá mbóte, bangó nyóhso nye, Nkoi andimí té, Mbali mpé andimí té.

« Nayébísákí yó níni? »

« Ah! Nabósání. Ah, sokí mpé boye naómóna mobémbo yangó ebongélí ngái té, názónnga »

« Té, kozónnga té, kosilika té, kasi ósúka, esíká tozókóma bási óyo bakopésá mbóte, endíma káka ngái, yó té, kondima lisúsu té ».

Azwí asimbí yě na litóyi

« oyókí? »

« nayokí , Nkoi, ndéngé lolingáná nazótósa yó té, nabalúkí nazózonga na ngái. Nazózonga káka nakokende lisúsu té.

Nkoi alobí:

« Tíká nalimbísí yó, nalingaka yó míngi, kosála lisúsu té ».

Nzóka Nkoi na mayéle, yě mpé Mbali na mayéle. Bakómí esíká baseka bazalí,

lisap'ónge!

ónge!

Mbóte na bino!

Mbóte eeee

Nkoi asilíkí alobí:

« ozóngélí lisúsu? »

« ah té, zwá kpongbo, nakomema lisúsu té mpó nákende. Zwá Nkoi! Mpó namóní, mobémbo mobébí mpó na ngái. Makambo na yó nyóhso nazótósa té, nazóyéba té, nání alokí ngái? zwá káka kpongbo na yó, ókende epái ya babokiló, ngái nasúkí áwa ».

Abwakélí Nkoi na makolo, abandí kozónnga. Nkoi amílobí: « ah! boye kúná nakolía ntaba té! ». Nkoi alandí yě mbángu alobi:

« yáká tokende, kosála lisúsu té. Yáká tokende. Sokí tokómí kúná, kosála lisúsu biloko wána té »

Bakómí epái ya babokiló, bayambí bangó malámu. Bapesí bangó biléi na masanga. Nkoi ayebísí Mbali: « óyo momekano mwá ngái mwá súka, sokí nalongí, nazwí mwási wa ngái mpé nakeí na yě.

Ekómí ntángo ya kolála, Nkoi abengí Mbali: « Moníngá, olálaka ndéngé níni? Mbali azongísí: « sokí omóhi ngái míso ezótála, nasínalálí, sokí míso na ngái ekangámí, lobá nalamúkí »

Ekómí na katikátí ya butú ntángo Nkoi abimaka kosála makambo ma yě, átála boye míso ya Mbali polélé, alobí « alalí ». Nkoi akamátí nsáni, abimí akeí o etóngá ya ntaba, akangí ntaba, abomí, aleí mpé asilísí. Akamátí makilá atiélí Mbali na nsé ya mbéto, alobí na nsé ya motéma: « óyo lóbí akomóna ». Asilísí, amatí na mbéto na yě mpé alalí.

Mbali atálí boye Nkoi alalí mpongí makási mpenzá, atélémi, akamátí nsáni ya makilá, atie epái ya Nkoi, akamátí mái azongísí epái na yě.

Lisap'óngé!

Ónge!

Ekómí ngonga ya ntóngó mpenzá, Mbali atélémi, amísopéli mái nókí mpé abimí libándá. Nkoi átála boye Mbali amísukóli, alobí « akomóhá ». Ámíbwákela boye, ayokí zéyi, ámeke kobénga Mbali, Mbali alobí: « nazalí áwa libandá nazóyóto moko » Nkoi mayéle masíli yé, nzóto mobimba etóndí na makila.

Babokiló bayéi na ntóngó, bakútí káka Mbali yé moko balobí:

« likambo ya moyíbi na bínó epái ya babokiló esíla té? »

Mbali alobí:

« tosálí níni? ».

Bazóngísí:

« ntaba moko ebúngí, wápi Nkoi? ».

Mbólókó alobí:

« nayébi té ».

Babéngí Nkoi kasi azóbima té. Babokiló bayébi sik'áwa te Nkoi ndé moyíbi. Mbali ayebísí babokiló te bákanga Nkoi nsé na ndáko mpo sókí abimí, bakokoka yé te.

Banóngó Nkoi boye, bamóhi yé azómílele, makila matondí yé nzóto.

Babokiló balobí: « Yó Nkoi ndé moyíbi, oyáka na baníngá áwa tozóboma bangó, nzóka ezá ndé yó? ». Balandí Nkoi, babéti mpé bamóbomí

Lisap'óngé!

Ónge!

Lisapo na bísó esúkí wáná

Ntína ya lisapo ezá te: sókí ozá na baníngá, ozákosála bangó mabé, oyéba te mokolo mosúsu moníngá moko akosúkísa yó. Yangó wáná Mbali, nyama moké boye asúkísákí Nkoi.